

保定府志

第三十冊 卷七十四卷七十五

列女五

祁州東鹿安州
新安鄉高陽

保定府志卷七十四

列傳二十八

列女十

國朝

東鹿縣

楊士孟妻劉氏明崇禎十六年士孟爲流寇所擄氏年二十三歲矢志守節先是士孟從兄士傑遭戊寅之難被執遺孤三就寄養士孟家氏撫之愛如己出士傑尋逃歸感其德因以三就爲之嗣後士傑死歿於杭州三就已成立氏令其扶父櫬歸葬焉

縣志

庠生張繩舜繼妻劉氏明崇禎十六年繩舜死於兵氏撫前室子偉訓之入泮苦節二十餘年已旌

魏見威妻賈氏威爲兵執去氏年十八無所出舅姑勸他適氏泣曰婦去翁姑何倚弗從及翁姑相繼歿皆自營喪葬年逾五十冰蘖不渝舊志當道旌之縣志

朱士忠妻崔氏明崇禎末土寇至士忠戰死氏年二十一歲尋夫屍弗獲禱於神夜夢夫來告以其處次日果得屍以葬勤紡績以養姑守節六十年而終子恆入庠邑令李表其門曰冰霜媲美大清一統志參縣志

庠生王文美妻邸氏順治初大盜李成文圍其家欲劫之氏懼辱墜樓死縣志

楊長壽妻鄭氏年二十三守節事舅姑以孝稱順治間邑令沈旌之

馮開文妻王氏二十三歲夫亡張玘妻喬氏十八歲夫亡俱歷

節終身

舊志

王某妻李氏夫亡於亂氏年甫二十孝事孀姑撫遺腹子成立

歷節終身

舊志參縣志

劉尙德妻潘氏尙德傭工外出尋卒氏于歸甫二歲紡績養姑

茹貧苦守六十餘歲卒

舊志

周欽妻楊氏欽隨叔國垣官河南死於賊氏年二十三奉舅姑

撫遺孤艱苦備嘗以節孝稱卒年五十歲

舊志

郭三秋妻馬氏三秋卒氏甫十七子未週歲撫之守節事舅姑

以孝稱舅沒事姑三十餘年八十一歲卒

同上

庠生李世涖妻耿氏世涖將卒以氏年幼命之他適氏矢死自

誓比夫歿持長齋懸夫像朝夕宗奠終身不離其側完節以終

縣志

晉得時妻袁氏年十六于歸未逾月得時賈於外四十五年無

音耗氏勤紡績奉老姑生養喪葬皆盡孝閭里咸欽重之

同上

二張氏一爲杜天起妻一爲杜天昇妻起二十歲卒無子昇二

十三歲卒遺二子長冲斗次如柏起妻育冲斗爲夫嗣昇妻留

如柏承夫嗣同心守節俱壽八十卒

舊志

邑令馬旌其閭

縣志

王本振妻李氏年二十四歲夫亡守節旣而孤亦卒遺幼孫復

撫之成立未幾孫失明曾孫四賴氏成人苦節五十餘載邑令

馬旌之

舊志參縣志

楊天琦妻鄭氏年十八歲夫亡誓從死舅姑泣諭之乃止勤紡

績事舅姑以孝聞撫遺腹子又震甲子登武科守節至六十歲

康熙三十四年旌

同上

庠生尹惟廉妻張氏二十二歲惟廉死於亂氏聞變遂投繯以

救免奉孀姑撫遺腹孤苦守四十餘年卒

舊志參縣志

張國侯妻吳氏年二十歲夫亡有遺產尋爲夫叔所賣氏讓之

絕不介意撫孤苦守四十八年雍正三年旌

雍正通志

庠生張敏德母吳氏早寡守節三十餘年雍正三年旌

同上

邊胡蚩妻李氏爲同村耿惡少挑之羞忿自經雍正三年旌

同上

張士達妻陶氏年十八歲夫亡孝事舅姑始終盡禮撫遺孤成

立爲衛武庠生守節四十四年雍正十二年旌

同上

庠生張晟妻王氏年二十五歲夫亡守節三十五年乾隆五年

旌

縣志

按雍正通志載張晟妻陶氏保定左衛人撫孤守節四十五年雍正四年旌考州縣志均無其人疑張晟卽係士達子入衛庠者其作陶氏者或以其姑之氏而誤別無可據附著之以備考

宋銀工子婦鄭氏事姑孝謹有鄰惡行無禮氏忿自縊

縣志

李世澤鄭烈婦詩序鄭烈婦者邑銀工宋氏子婦也舅歿夫幼弱謹事寡姑比鄰有惡少者充邑隸素無賴美鄭容伺其私登溷垣窺之鄭覺泣訴於姑姑憚其凶暴戒勿強也惡少自以爲莫敢誰何復伺之如故鄭度與爭終不得直痛哭不飲食者數日姑慮其有不測也防之嚴鄭忽言笑如平常乃不復防至夕自經死宋之戚屬以其事聞於官官得其情執惡少薄懲而遣焉邑人憫其事爲詩弔之予聞之曰異哉鄭但爲惡少所窺耳非受其污也可以無死而竟甘死如飴焉蓋仁人志士其律已也至嚴惟纖毫之類人可代爲恕者斷焉不使加諸其身今鄭之可以無死而竟甘死如飴者生於恥也以惡少之窺爲不足恥則可以無死以爲小恥亦可以無死以爲天下之至恥則不能一日覩然於人世矣斯謂充義之盡纖毫之類人能恕之而斷不使加乎其身者耶推此志也惟與日月爭光可也卽古所稱斷臂截鼻之事何以加哉

靳虞鳴幼而瞽妻李氏事之謹虞鳴卒氏年二十三守節六十

一年卒

同上

謝宗顏妻雒氏年二十四守節萬厯五十八年以孝慈旌

同上

馬士麒繼妻雒氏年十九歲夫故撫前室子如已出厯節四十

八年

舊志乾隆四年旌

縣志

張翰標妻高氏于歸五載夫故矢從死家人以大義止之撫二子均成立守節三十六年乾隆五年旌

李志成妻焦氏夫外出鄰惡李亮寅夜撥門入氏驚呼亮嚇禁之不能止其姑聞聲往救亮始逸去氏羞忿莫釋姑恐其死終日防之至夜半仍自經乾隆六年旌

馮士奇妻李氏年十七于歸夫卽抱疾氏侍疾彌謹越數月夫歿事舅姑撫猶子均盡職茹貧貞守五十餘年乾隆七年旌

張士元妻郭氏年二十一歲士元卒孝事舅姑撫孤成立訓孫入泮守節六十四年乾隆七年旌

姚繼珍子婦張氏性貞烈有惡少穢言戲之氏羞忿莫釋遂自經死乾隆十一年旌

馬荆妻趙氏荆卒氏年十有九歲家貧無子奉舅姑苦守以孝
慈稱厯節三十餘年乾隆十七年旌

葉璽妻郭氏性貞淑有鄰惡偵璽外出入室調之氏喊拒始逸
去璽歸氏泣訴之乘間自經乾隆十七年旌

侯玉山妻冀氏遇強暴欲污之氏誓不受辱被扼死乾隆二十
年旌

高大業妻周氏年二十守節王永清妻賈氏年十九守節丁士
方妻王氏早寡守節邑令李並旌其門

孝廉耿溶妻劉氏年二十三夫亡紡績度日撫孤崙訓之入泮
厯節五十餘年

庠生郭浩妻董氏年二十七守節事祖姑以孝稱撫二子皆成
立長汝霖入邑庠厯節四十餘年

馬嗣叔妻魏氏于歸六載而寡誓從死家人以舅姑在爲勸乃矢志苦守以孝著

監生王道易妻靳氏年二十歲夫亡事祖姑及舅姑皆盡職教子成名以節終

高允瑛妻王氏早寡守節事親撫孤孝慈兼盡戚族稱之乾隆二十八年旌

王花子妻田氏性貞淑有田章者素無賴出戲言褻狎之氏羞忿莫釋捐軀明志乾隆三十年旌

任延慶妻王氏延慶卒氏年甫二十矢志苦守事垂白舅姑生養死喪均盡禮乾隆三十二年旌

張丫頭妻祁氏有強暴欲污之堅拒不從因之羞忿自盡事聞旌之

王燦妻鄭氏有王某欲污之氏堅拒不從被殺乾隆三十五年旌

某烈女姓氏里居不可考乾隆三十九年女年十一父母攜至本邑鬻於媒氏媒氏故倡戶女去之越二載年少長度無計自免遂赴水死

郭紱妻魏氏年二十歲夫亡事舅姑撫遺孤勤苦備嘗乾隆四十年旌

宿人傑妻韓氏十七歲于歸越三載而寡無子事舅姑得歡心乃擇族子爲夫後教之成名乾隆四十五年旌

李白狼妻馮氏爲惡紳楊強污不從捐軀自盡已旌

梁時興妻王氏爲族惡梁五逼姦不從被殺乾隆四十九年旌賈名題妻穆氏邑之世家女幼聰慧讀書明大義年十六于歸

事舅姑得堂上歡佐夫讀每至夜分講解不綴無何名題染時疫賁志以歿彌留之際以善事二老囑無他言氏卽殯殮畢節哀供婦職自是勤儉紡績晨夕視膳不怠而舅姑若忘其無子也者氏無所出諸昆季知其賢皆欲以其子爲之後氏察識厚重者嗣之尋以學行著成均迨舅姑相繼殂謝氏以勤苦成疾卒乾隆五十二年旌

王毛妻喬氏性和婉孝舅姑勤紡績夫婦相對如賓邑人咸以賢孝稱之

馬四妮妻李氏有鄰惡趙方子欲污氏堅拒不從羞忿自盡乾隆五十七旌

曹織城女爲高大胖逼狎不從自縊死已旌

劉儒秀女性貞烈有劉黑子者出言蔑之女聞而自經嘉慶元

年旌

張霞女以族惡張立山戲言狎之羞忿自盡嘉慶二年旌

監生种燦妻張氏十九歲而夫亡遺孤甫彌月痛幾死既葬朝夕侍姑忽見氏失一指怪而詰之泣不能言蓋燦疾亟時屢矚以目欲言而不能出口者再氏會其意因斷指以自明他人不知也姑疾禱祈以身代疾遂愈性儉樸勤操作家由是饒裕訓孤子有方孫枝亦繁衍卒年七十二歲廉訪黃旌其門曰節惠淑範

田野疇妻李氏蕭增彩妻駱氏監生張清俊妻郭氏俱年二十而寡韓英才妻賈氏年二十六而寡孫玉章妻王氏年二十八而寡監生王利聚妻張氏年十九而寡俱以苦守終

庠生薛蘭芝妻李氏年二十而夫亡孝事舅姑矢志苦守訓嗣

子英發及孫士清皆入泮學政金旌其門

孟百順妻李氏年二十五守節劉振才妻傅氏年二十一守節
監生穆燦妻杜氏年二十一守節均以壽終

王陵妻王氏于歸五載而夫亡氏矢志守節事孀姑至孝勤紡
績奉甘旨歷三十餘年姑忽病氏默禱願以身代姑死而復甦
康健如故又十餘年乃卒人咸以爲孝所感

武生韓英傑妻劉氏年三十歲夫亡投繯者三皆以救免事舅
姑撫幼子以節終

韓英雄妻謝氏年二十歲夫亡苦守五十五年

馮善妻趙氏善外出始終無音耗氏勤紡績奉舅姑甘旨無缺
者三十餘年

石治邦妻呂氏年十九于歸逾月夫外出不歸呂奉事舅姑守

節五十餘年卒

王汝清妻張氏牛多學妻孟氏俱年二十一歲夫亡高純妻韓氏二十五歲夫亡馮念祖妻張氏二十一歲夫亡周璵妻李氏二十四歲夫亡監生劉純妻賈氏二十七歲夫亡皆苦守以終其身

李武元妻尙氏年十七于歸甫半載而寡事舅姑以孝稱守節四十餘年

楊尙德妻李氏周士祿妻郝氏俱二十而寡高應本妻張氏年二十五而寡曹孔昭妻楊氏年二十二而寡曹壽先妻邊氏年十八而寡王永壽妻葉氏年二十一而寡俱歷節終身

庠生周璵繼妻王氏年十七于歸甫兩月而寡事舅姑以孝聞姑疾終日侍側無倦容撫前室子恩愛有加戚族皆稱其賢以

節終

李庭麒妻楊氏于歸六載而寡勤女紅事舅姑盡孝後舅謀食外出歿氏貸資托所親歸櫬以葬苦守數十年卒

監生高凌霄妻杜氏年二十七歲夫亡奉舅姑撫幼子苦守子早卒媳杜氏亦矢志靡他一門雙節閭里皆欽敬之

郭濟宇妻楊氏年二十一守節王希聖妻裴氏王彭齡妻种氏年俱十九守節終身不渝其操

郭世忠妻張氏十九歲夫亡事祖舅姑及舅姑皆盡禮氏無子以元章爲夫後尋亦故媳薛氏年二十四依姑以守

王學妻杜氏年二十歲守節子彥興旣娶而亡媳張氏年三十苦守以終其身

种實妻李氏二十一歲夫亡事姑以孝稱姑亡哭之幾喪明卒

年六十八歲

庠生尙賓妻劉氏性賢淑佐夫讀有聲庠序未幾賓亡氏年二十有四孝事舅姑撫二子訓之有方戚族皆以爲賢

焦某女性貞淑年十八許字同里郝姓子將嫁而夫亡女聞之容色慘變狀若癡家人怪之女托以疾越二日投繯死

李自新妻謝氏年二十二歲夫亡無子姑雙瞽氏事之謹勤紡績供甘旨三十年如一日比姑歿喪葬盡禮以節終

邢四妻耿氏年十七于歸夫至愚不辨菽麥氏事之謹踰歲夫卒母勸改適氏截髮毀容矢死自誓孝事舅姑撫夫姪爲嗣訓之弱冠入武庠

以上俱縣志

師濟堂妻馮氏讀書知大義年二十三歲夫亡守節訓子崇儒

入泮

縣續志